

Morning Dogri (NSD) National News Bulletin 05-10-2024

आकाशवाणी

- हरियाणा च विधानसभा चुनाएं लेई मतदान जारी ऐ।
- प्रधानमंत्री नरेन्द्र मोदी होर अज्ज महाराष्ट्र च 56 ज्हार करोड़ रपे दी लागत आली केई विकास परियोजनाएं गी शुरू करगंन।
- विदेश मंत्री डा जयशंकर होर इस महीने शंघाई साथ सहयोग संगठन दी बैठक च हिस्सा लैने लेई पाकिस्तान दे दौरे पर जांगन।
- भारत नै आतंकवाद खलाफ अंतर्राष्ट्री समझौते गी मतदाताएं दे अपने आहवान गी चेता नुआया ऐ।
- भारत दा विदेशी मुद्रा भंडार 7एं हफते च 12.15 बिलियन डॉलरें तोड़ी बधने मगरा 700 बिलियन दे निशान गी पार करी गोआ ऐ।
- दुबई च खेड्डे गेदे महिला टी-20 क्रिकेट विश्व कप मैच च न्यूजीलैंड नै भारत गी 58 रंजें कन्नै हराई दित्ता।

<><><><><><>

Harayana Elections

हरियाणा च 90 विधानसभा सीटें लेई इक्कै गेड च होआ'रदे विधानसभा चुनाएं लेई मतदान जारी न। मतदान बडलै 7 बजे शुरू होआ हा ते संजा 6 बजे तोड़ी जारी रौंहगन। 2 करोड़ 3 लक्ख थमां बद्द मतदाता चुनाएं च खेड्डाते दे 1 ज्हार 31 मेदवारें दे चुनावी भविक्ख दा फैसला करगंन। चुनाएं गी सुचारू ढंगै सिर करोआने लेई राज्य भरै च 20 ज्हार 632 मतदान केन्द्र स्थापत कीते गेदे न। राज्य दे मुख् चुनां अधिकारी पंकज अग्रवाल होरें आखेआ जे चुनाएं गी रमानदारी ते आजाद ढंगै कन्नै करोआने लेई सब्बै मतदान केन्द्रें च सुरक्षा दे निग्गर इंतजाम कीते गेदे न ते सब्बै मतदान केन्द्रें च वैबकास्ट दी सुविधा बी दित्ती गेदी ऐ।

<><><><><><>

PM-Appeal

प्रधानमंत्री नरेन्द्र मोदी होरें लोकें गी अपील कीती ऐ जे ओह हरियाणा च अज्ज इक्कै गेड़ तैहत होआ करदे असेंबली चुनाएं च रिकार्ड गिनतरी च मतदान करन ते लोकतंत्र दे इस उत्सव दा हिस्सा बनन। सोशल मीडियो दी इक पोस्ट च मोदी होरें राज्य दे ओकड़े सब्बनें युवा मतदाताएं गी शुभकामनां दित्तियां न जेहड़े अज्ज पैहली बारी वोट पाने दे हक्कै दा इस्तेमाल करन जा'रदे न।

<><><><><><><>

PM-Maharashtra

प्रधानमंत्री नरेन्द्र मोदी होर अज्ज महाराष्ट्र दे इक ध्याड़े दे दौरे पर होंगन। अपने दोरे दरान प्रधानमंत्री होर वाशिम च राईबाई ते पशुपालन सेक्टर कन्नै सरबंधत तकरीबन 23 ज्हार करोड़ रुपें दिएं बक्ख-बक्ख पैहलकदमिएं गी शुरू करोआंगन। ओह बन्जारा विरासत अजैबघर दा बी उद्घाटन करगंन। मगरा ओह ठाणे च 32 ज्हार 800 करोड़ रुपे दिएं बक्ख-बक्ख विकास परियोजनाएं दे नीह पत्थर रक्खगंन ते केइएं दा उद्घाटन बी करगंन। वाशिम जिले च मोदी होर प्रधानमंत्री किसान सम्मान निधि योजना दी 18मीं किशत जारी करगंन। इस कार्यक्रम दरान मुख्य भरै दे 9 करोड़ 40 ज्हार करसाने गी 20 ज्हार करोड़ रुपें शा मते दा लाह हासल होग। मोदी होर 1 ज्हार 920 करोड़ रुपें दे कृषि ढांचागत विकास कोष दे तैहत 7 ज्हार 500 प्रोजेक्ट राष्ट्र गी समर्पित करगंन। मोदी होर मवेशिएं लेई संगठित जिनोम चिप बी जारी करगंन। एहदे अलावा ओह महाराष्ट्र च 19 मैगावाट दी समर्थ आले 5 सोलर पार्क बी राष्ट्र दे नमित लांगन। ठाणे च प्रधानमंत्री होर महत्वपूर्ण मैट्रो ते शिड़क परियोजनाएं दा उद्घाटन ते नीह पत्थर रक्खगंन। ओह बीकेसी थमां आरे जेवीआईआर सेक्शन तगर चलने आली मैट्रो ट्रेन गी बी रवाना करोआंगन।

<><><><><><><>

Jaishankar-Pakistan

विदेश मंत्री डॉ. एस.जयशंकर होर इस म्हीने शंघाई सैह्योग संगठन एससीओ दी बैठक च हिस्सा लैने लेई पाकिस्तान दे दोरे पर जांगन।

विदेश मंत्रालय दे प्रवक्ता रणधीर जैसवाल होरें कल एहदी तस्दीक करदे होई आखेआ जे विदेश मंत्री होरें 15 ते 16 अक्टूबर गी पाकिस्तान दी राजधानी इस्लामाबाद च लग्गने आले शंघाई सैह्योग संगठन दे शिखर सम्मेलन च शामिल होने जा'रदे भारतीय शिष्टमंडल दी अगुवाई करगंन। अगस्त च पाकिस्तान नै प्रधानमंत्री नरेन्द्र मोदी होरें गी एससीओ दे बैठका च हिस्सा लैने लेई इस्लामाबाद ओने दा साद्दा दित्ता हा। डॉ. जयशंकर हुंदे इस दोरे गी मता महत्वपूर्ण मन्नेआ जा'रदा ऐ की जे भारत आस्सेआ लैता गेदा एह इक बड्डा फैसला ऐ। एहदे शा पैहले दिसम्बर 2015 च उस बेले दियां विदेश मंत्री सुषमा स्वराज होर अफगानिस्तान बारे लोआए गेदे इक सम्मेलन च हिस्सा लेने लेई इस्लामाबाद गोइयां हियां।

<><><><><><>

India-UN

भारत नै आतंकवाद खलाफ लगभगत 20 ब'रें पैहले प्रसावित पैहले अंतर्राष्ट्रीय समझोते गी अपने दे आह्वान गी इक बारी फही चेता नुआया ऐ। वीरवारें संयुक्त राष्ट्र महासभा दी कनूनी कमेटी गी संबोधत करदे होई भारत दी संयुक्त राष्ट्र मिशन च लीगर अफसर आर. मिथिली होरें आतंकवादी ग्रुपें दी ताकत च बाद्धे उप्पर चिंता जाहर कीती, जिंदे कोल अपनी समर्थ बधाने लेई ड्रोन जनेई संवेदनशील तकनीक बी ऐ। उनें आतंकवाद खलाफ निबडने लेई मुखें गी आतंकवाद उप्पर अंतर्राष्ट्रीय कनवेंशन लोआने पर जोर पाया। मिथिली होरें उनें मुखें दी निंदेआ कीती जेह्दे राजनीतिक कारणें लेई आतंकवाद दा पक्ख लैंदे न ते किश ग्रुपें गी स्वतंत्रता सैनानी दे तौरा पर पेश करदे न। उनें आखेआ जे इनें राजनीतिक एजेंडें कारण अंतर्राष्ट्रीय स्तर पर आतंकवाद खलाफ कुल संसारी लड़ाई कमजोर होई ऐ। उनें आतंकवाद गी खत्म करने लेई सब्बै मुखें गी किट्ठे होई लडने दा आह्वान कीता।

<><><><><><>

India-Forex

चीन, जापान ते स्विडजरलैंड दे कन्नै भारत 700 अरब अमरीकी डॉलरें दे विदेशी भंडार गी पार करने आली दुनिया दी चौथी अर्थबवस्था बनी गेआ ऐ। 27 सितम्बर गी खत्म होए दे हफते च भारत दा विदेशी मुद्रा भंडार 12.588 बिलियन डॉलर बधियै 704.885 बिलियन डॉलरें दे अजें तगर दे सब्बनें शा उच्चे स्तरै पर पुज्जी गेआ। 20 सितम्बर गी खत्म होए दे हफते च विदेशी मुद्रा भंडार 2.8 बिलियन बधियै 692.3 डॉलर होई गेआ हा।

विदेशी मुद्रा भंडार च ते बाद्धे नै आलमी सतह दिएं आर्थिक अनिश्चितताएं कन्नै निबडने दी भारत दी समर्थ गी मजबूत कीता ऐ ते अस्थिर अंतर्राष्ट्रीय बजारें दे सामने एह्दी मुद्रा गी मती स्थिरता प्रदान कीती ऐ। अज्ज जारी आरबीआई दे ताजा आंकड़े मूजब भारत दा सुन्ने दा भंडार 2.184 अरब डॉलर बधियै 65.796 अरब डॉलर होई गेआ ऐ।

<><><><><><>

Chattisgarh-Maoist

छत्तीसगढ़ दे नारायणपुर च कल होए दे इक टाकरे च सुरक्षाबलें 28 मोआवादिएं गी मारी तकाया। एह टाकरा नारायणपुर जिले दे दक्खनी अबुजमाद इलाके च होआ। मारे गेदे माओवादिएं दियां लोथां बरामद करी लैती गेइयां न। एह्दे अलावा उत्थुआं ए.के.47 रैफलां ते होर बी केई किस्मै दे थेआर ते गोली बरूउ बरामद कीते गे न।

<><><><><><>

Amit Shah-Drugs

केन्द्री गृहमंत्री अमित शाह होरें आखेआ ऐ जे प्रधानमंत्री नरेन्द्र मोदी हुंदी अगुवाई च पिछले 10एं बरें दरान 5 लक्ख 43 ज्हार 6 सौ किलोग्राम शा मता नशे दा समेयान जब्त कीता गेआ ऐ। एह गल्ल उनें कल गांधी नगर च इक सार्वजनिक समारोह दरान आक्खी। शाह होरें एह बी आखेआ जे केन्द्र सरकार दा मकसद साढी युवा पीढी गी बचाने लेई भारत गी नशा मुक्त बनाना ऐ ते सरकार आस्सेआ इस दिशा च जरूरी जतन कीते जा'रदे न।

<><><><><><>

Rajnath-Defence

रक्षामंत्री राजनाथ सिंह होरें आखेआ ऐ जे सरकार भारत दे रक्षा उद्योग गी निर्यात आला बनाइयै मुल्खै गी माल तैआर करने आला कुल संसारी गढ़ दे तौरा पर स्थापत करने लेई प्रतिबद्ध ऐ।

नमीं दिल्ली च कल एसआईडीएम दी 7मीं सालाना बैठक गी संबोधत करदे होई रक्षा मंत्री होरें 2023-24 च रक्षा उत्पादन 1.27 लख करोड़ तोड़ी पर पुज्जी जाने पर खुशी जाहर कीती। मंत्री होरें एआई साईबर सुरखा ते होरने अध्याधुनिक तकनीकें च निवेश करने दा आह्वान कीता।

<><><><><><>

Cricket

दुबई च लंदी रातीं खेड्डे गेदे महिला टी-20 क्रिकेट विश्वकप 2024 मकाबले च न्यूजीलैंड नै भारत गी 58 रंजें कन्नै हराई दित्ता। पैहले बल्लेबाजी करदे होई न्यूजीलैंड नै 20एं ओवरें च 4 विकटें दे नुकसान च 160 रंज बनाए। लक्ष्य दी पीछा करदे होई भारतीय टीम 19एं ओवरें च 102 रंजें पर आउट होई गई।

<><><><><><>